

南

漢

書

南漢書卷十二

順德梁廷枏章冉撰

列傳第六

諸臣傳四

萬何蕭侯王盧陳李吳謝列傳

萬景忻亡其家世鄉里少以驍勇聞高祖稱號
拔爲牙校大有時屢從征討積功至指揮使殤
帝初嗣位有妖賊張遇賢聚衆起正州攻掠近

海諸州縣殤帝命越王洪昌循王洪杲同率兵
往討與賊遇戰半日賊圍益衆二主困不可出
時景忻隸戲下與指揮使陳道庠挾弓弩馳馬
畧其陣陣堅不可攻復奮劍大呼殺賊突圍入
殺十餘人賊衆披靡以大楯蒙二王翼之走圍
潰得脫賊遂解去應乾改元復出兵攻循州與
遇賢戰敗之克復循州逐遇賢遇賢逾嶺不復
南事聞有詔褒獎

何詞不得其鄉里累官至宮苑使乾亨末唐莊
宗滅梁卽帝位兵威頗震高祖聞之恐遂有包
并四方志欲遣使入汴假通聘好因便覘其虛
實選難其人廷臣咸薦詞嫻言對當不爲國辱
卽命以原官往奉書稱大漢國主致上大唐皇
帝時莊宗在魏都詞至召見於鄴宮與講釣禮
不少屈莊宗問高祖近事詞具言之且云本國
聞陛下新登大寶仰慕聲靈已發使臣大陳物

貢期以今秋必至先遣下臣肅將賀悃莊宗信
之禮成辭歸語高祖曰唐主自移梁鼎滿假而
驕近復寵嬖諸伶荒淫無度其朝章已紊行自
救不暇何能以道御遠方固知其無足畏也高
祖大悅遂不復與唐通逾年莊宗被弑人皆服
詞之先知焉同時有何瑱劉瑋鄭勣蕭規公孫
惠勝紹英者皆一時皇華之選嶺北諸藩歲時
通好多賴其力瑱仕高祖爲左僕射美容觀風

姿玉立饒有文采大有初吳越武肅王璠與承
命如吳越致祭言論風發大得嗣王心劉瑋乾
亨初客省使高祖稱帝命瑋告卽位於吳且勸
吳王隆演稱大號蒙厚賚而歸翔大有時官都
官郎中南唐烈祖受吳禪遣使來通好自後聘
問不絕時烈祖以誕生日爲仁壽節翔銜命往
南唐致賀逾年歸終於其官蕭規逸其職官鄉
里高祖崩殤帝欲續隣好使告哀於南唐頗得

使臣禮公孫惠事高祖爲法物使光天元年繼
規如南唐告卽位規先以六月至逾兩月惠亦
至同時兩使南唐人盛稱殤帝能篤睦隣之誼
云滕紹英亦失其官爵先是南唐烈祖仁壽節
高祖歲遣使往賀殤帝嗣位將修故事擇能而
使紹英遂膺是選

蕭益梁昭明太子之後先世皆顯宦多爲唐宰
輔曾祖悟仕至大理司直祖倣登進士第厯諫

議大夫積官兵部尙書尋以本官同平章事累遷中書門下二侍郎左右僕射宏文館大學士出爲嶺南節度使父廩進士擢第累遷尙書郎免官侍父出鎮尋召爲中書舍人遷京兆尹高祖以益家世清顯招致錄用大有中累官崇文使時皎公羨與楊廷藝故將吳權相舉兵爭交州公羨遣使致賄來乞師高祖將襲有其地使萬王洪操統衆救公羨自將兵駐海門爲聲援

問策於益益曰今霖雨積旬海道險遠吳權桀
黠未可輕視大軍當持重多用鄉導然後可進
否則兵未戢也高祖不聽權果殺公羨引舟師
來誘洪操戰於海口洪操全軍沒死高祖始思
益言大悔收衆急還無何高祖病與右僕射王
勰謀先出殤帝中宗於外鎮而後傳位越王洪
昌計定欲降制會益入問疾高祖具以勰議告
且令更籌之益諫曰立嫡以長古今通制違之

而立少者則長者必爭况兩王居外兵力易集
若反兵內向何以禦之恐國家禍不旋踵矣高
祖乃止

侯融未詳其世系事高祖官著作郎爲人慷慨
立朝能直言高祖初年出兵悉平諸寨諸州向
不臣服者以次削平之頗以善兵自負稱號後
益得志將舉兵北伐融乘間言嶺南久被征戰
防百姓耕耨苦不聊生陛下建大號耆定疆宇

正宜弭兵息民奠安南土今窮兵黷武日事戰
爭非太平所宜有也高祖稍用其言故乾亨初
數年間不復衽席金革無何融卒交州之役交
王洪操遇害高祖旣深痛其子之死且以兵敗
自愧追咎融言謂戎事不振實融所致詔剖棺
暴其尸

王黼逸其鄉里大有末積官至右僕射兼西院
御史高祖不豫當立儲以殤帝中宗年雖長而

性皆驕恣獨越王洪昌孝謹有識頗與己類欲
遂立洪昌意尙猶豫召翽議翽力贊成之且勸
高祖亟出殤帝鎮邕州中宗鎮容州俟其行而
後下詔高祖是其言將有制書爲蕭益力諫事
遂寢中宗初元遷左僕射乾和二年洪昌旣被
殺追論翽建議廢長之罪貶爲英州刺史未至
使人要於路殺之

盧膺不知所自起大有時累官工部侍郎初馬

后有女弟字吳越王弟新安侯傳璠蚤寡馬后
既殂高祖欲續楚舊姻將求爲繼后先請於楚
文昭王王旣內主其事而慮吳越不許約高祖
自遣使往求之楚亦使其中軍使歐陽練偕行
以期必濟至是膺以原職權攝太尉與尙儀謝
宜清尙衣高素清等俱至吳越謁文穆王備陳
高祖意王召馬氏商之馬氏具言久甘守節故
夫義重不忍他適因以死誓文穆王從其志竟

不遣膺知不可奪辭歸中宗襲位拜中書侍郎
同平章事乾和十五年卒官

陳偓亡其世序事高祖厯官戶部侍郎乾和初
越王洪昌輔政有賢稱中宗恐其得衆計殺之
於是更選揆席廷臣咸推偓遂加同平章事偓
庸懦無能居相位絕少建白僅備員而已

李璵不知何地人事中宗爲給事中交州吳權
旣敗死交王洪操自爲節度傳子昌岌皆負固

不廷至是昌岌死其弟昌文使來稱臣中宗假以靜海節鎮遣璵持旌節招令入朝行抵白州會昌文中變遽使人止之曰海寇竊發往來道阻恐有行李之虞璵信之遂還後數年卒

吳珣鄉里已逸積官至巨象指揮使爲人有勇畧善出奇計乾和中中宗乘楚王兄弟爭國之釁思襲有其地使珣及招討使吳懷恩同攻賀州城旣陷而後楚將徐知新任廷暉督兵來救

珣與懷恩謀先使人於城外鑿大窋以竹箔覆蔽傳土其上如平地設機穴中待之知新等引衆逼城近珣潛募人入穴發機楚兵盡墮相踐踏死者不可勝算知新僅以身免懷恩分兵攻昭州珣復引所部擾掠全州邊乃還

謝貫少有膽勇喜鏖戰戰功稍遜吳珣而皆以善戰稱於時乾和中與內侍省丞潘崇徹攻楚郴州時南唐武安節度邊鎬奉其國命駐湖湘

趣馬氏歸江南聞報發兵來爭崇徹迎戰貫策
兵爲應南唐大敗遂克郴州康崇保乾和中爲
步將從貫攻郴州南唐救兵至義章崇保與崇
徹分兵爲兩翼擊敗之俘獲無算悉滅其一臂
縱之去

南漢書卷之十二終

南漢書考異卷十二

順德梁廷枏章冉撰

萬景忻傳

挾弓弩馳馬畧其陣復奮劍大呼殺賊十餘人
賊衆披靡以大楯翼二王得脫

通鑑止云力戰救之九國志劉洪杲傳裨
將萬景忻等蒙以大楯翼二王以出陳道
庠傳道庠與景忻等奮劍大呼殺十餘人

不載蒙以大楯事十國春秋與陳道庠挾
持弓弩馳馬畧陣力救二王無奮劍呼殺
賊及蒙大楯事諸書互有詳畧今悉爲補
入

何詞傳

欲遣使入汴假通聘好因便覘其虛實

通鑑漢主聞唐滅梁而懼遣何詞入貢且
覘中國強弱吳越備史亦云入貢京師惟

薛史書來聘按薛史云稱大漢國主致書
上大唐皇帝莊宗召問南海事狀具言本
國已發使臣陳貢物今秋卽至據此則詞
出使時未具貢物往不當書入貢矣又按
通鑑同光元年唐使吳稱詔吳人不受唐
帝易其書用敵國禮曰大唐皇帝致書吳
國主吳人復書稱大吳國主上大唐皇帝
今南漢書詞稱謂與吳同是用敵國鈞禮

異

當書聘不當書入貢矣十國春秋南漢紀
依通鑑云入貢誤蓋通鑑與備史皆尊中
朝書法應爾春秋各紀一國自有內詞且
更當核其實也又薛史稱大漢國王王當
作主蓋文偶缺耳

公孫惠傳

惠十國春秋作孫惠今從陸氏南唐書

蕭益傳

祖倣以本官同平章事遷左右僕射

通鑑天福三年註云蕭倣相唐懿宗新唐書宰相世系表倣字思道相僖宗按新書咸通十四年七月懿宗崩僖宗立十月以倣同中書門下平章事則倣實相僖宗不相懿宗也今從新書又新書尙書左僕射蕭倣爲中書侍郎同中書門下平章事今按舊唐書倣傳咸通末復爲兵部尙書判

異

度支尋以本官同平章事累遷中書門下
二侍郎兼戶部兵部尙書遷左右僕射是
遷僕射在同平章後與新書異今從舊書
父廩累遷尙書郎召爲中書舍人遷京兆尹

新唐書宰相世系表廩字富侯給事中按
舊唐書廩傳止云咸通三年進士擢第累
遷尙書郎乾符中以父倣鎮南海免官侍
行中和中徵爲中書舍人遷京兆尹固不

云終於給事也今從舊書

大有中累官崇文使

新唐書宰相世系表益南州團練推官按
歐史通鑑皆止云官崇文使是時南漢諸
州地無名商者或益未仕南漢以前曾官
是職諸書無考今姑闕疑又十國春秋大
有初官崇文使按益爲崇文使始見於通
鑑天福三年諫救交州事是年卽南漢大

有十一年歐史亦繫於大有十年後春秋
云大有初卽官崇文使不知何據也

王黼傳

使人要於路殺之

通鑑云未至賜死內外皆懼不自保十國
春秋從之歐史云使人殺之於路按當時
追論立少之罪已遭貶謫復於半道遽賜
之死未免顯以淫刑示人矣晟雖克暴似

不出此釋歐史之文當如使盜殺洪昌故
智蓋必致之死而不欲自居殺之之名也
盧膺傳

官工部侍郎

吳越備史番禺劉龔遣僞攝太尉工部侍
郎盧膺來逆馬氏爲繼室通鑑顯德四年
南漢中書侍郎同平章事盧膺卒膺姓名
官偕僅見於此曝書亭集歲在壬申重遊

嶺表南海陳元孝飯子光孝寺語子劉龔
墓葬番禺治東二十里崇禎丙子土人發
其墓有碑一具書翰林學士知制誥正議
大夫尙書左丞上紫金帔臣盧應奉勅撰
文曰維大有十五年歲次壬寅四月甲寅
朔念四日丁丑高祖天皇大帝崩於正寢
越光天元年五月癸未朔十四日丙申遷
神於康陵禮也云云亡友吳志伊撰十國

春秋盧應更作膺謂事龔爲工部侍郎大有中加太尉中宗時拜中書侍郎同平章事銜名不合惜其已逝未得此異聞也據此則朱氏固以爲膺卽應而疑十國春秋誤加改易矣又王士正皇華紀聞所紀盧應下一字乃初字粵東金石畧引廣東新語云所記應下一字乃勅字兩書俱無奉字是其名一作應初一作應勅碑以崇正

丙子出土至彝尊遊粵時中間裁隔五十
七年撰新語者又嶺南土著而所記互異
已若此蓋朱氏旣得之口述而陳氏又出
自記憶均非目覩碑文則碑內之姓名尙
未確定又安能據碑而疑春秋之錯更乎
且據備史通鑑臚之歷官原與碑異或疑
碑內未題全銜然南漢職官多依唐制今
考舊唐書志工部侍郎與尙書右丞皆第

四品下階則兩銜對品究以何者爲所遷
階乎知撰碑者別爲一人無疑矣又春秋
稱膺才藻俊茂酷有體裁二語他無所據
當暗指撰康陵碑而言似吳氏亦嘗疑兩
人卽一人特未敢懸斷耳

馬氏有女弟字傳璠蚤寡

十國春秋傳璠傳云天寶十四年娶楚武
穆王女馬氏未幾傳璠死按吳越備史膺

異
如吳越逆馬氏在天福六年辛丑逆推至
天寶十四年已閱百八十六年矣春秋誤

南漢書考異卷十二終

南漢書卷十三

順德梁廷枏章冉撰

列傳第七

諸臣傳五

二劉鍾暨陸雷陳伍盧李植蕭王馮胡列傳

劉傳失其家世大有末官循州刺史州境與正
州接壤殤帝初元羣盜四起各擁衆無所統制
共推博羅縣吏張遇賢爲帥圍循州時烏合之

眾不下數萬事起倉卒傳兵少不能禦城陷死之

劉博古不知其鄉里中宗時厯官潯州刺史能恤民疾苦多惠政部民愛之若所自出州有陸公井博古嘗植橘其旁潯人稱曰橘井以誌舊德博古旣沒猶共指爲劉公遺澤不忍斬刈云有曾芳者不知何時人官程鄉令爲政清簡因民苦瘡瘍給藥濟之求者踵相接芳乃以大囊

盛藥投井中令民汲水飲皆愈程鄉人名其井
曰曾井芳沒立祠井旁病者禱之飲井水亦愈
謝傑亦不知何時人官高州刺史先是州多虎
患夜入城郭噬人民爭訴之傑沐浴詣城隍祠
舉杯祝神曰愚民何辜而虎暴之此刺史無德
化所致願虎但食刺史無傷民祝畢屏去左右
獨宿洞庭夜漏三下祠東南隅忽有物如雷吼
良久乃止旦見數虎皆斃

鍾有章尙書左丞允章弟也少有文藻與允章
齊名累官翰林學士中書舍人後主初嗣位於
羅浮山建天華宮又立雲華閣兩門左爲含陽
右爲起雲其亭有甘露羽蓋諸名皆極宏麗命
有章爲文記之稱大手著作不半年允章被誣
伏法遂有滅門之禍時有章已先卒故不及見
暨彥贇家世未詳乾和中累官巨艦指揮使時
中宗尙奢華離宮宴幸耗費不貲正供所入日

就支絀因陰遣彥贊率兵士入海窺商舶重載者詐爲盜劫其金帛歸獻充益無名之費內侍省丞潘崇徹旣克郴州使彥贊戍其地捍衛邊境悉盡心力頗以方畧聞於時大寶七年宋將丁德裕等來圍郴城彥贊出戰不利城陷爲宋兵所殺

陸光圖四會人祖東升初爲烈宗裨將守端州高祖稱帝遷兵部侍郎父昂累官桂州刺史領

靜江軍節度使光圖胄望顯貴少承家學讀書
識大義歷官至閤門副使後主方寵任閹宦百
官多求入知內待省光圖以爲辱力請外任後
主知其意不足於閹宦惡之欲處以極邊惡地
卽除郴州刺史光圖至郴出俸錢周恤窮民招
輯逃亡士卒日加訓練四境遂安謐無寇警郴
民呼爲陸父大寶七年宋師南來抵郴鄙光圖
遣兵柵騎田嶺會雨漲黃溪水溢宋將丁德裕

潘美等乘漲卒至柵爲所破光圖與指揮使暨
彥贊力戰大敗被執抗罵不少屈遂與俱死時
有龐姓者亡其名爲光圖舊所屬吏嘗因奏事
見後主後主識之及降宋後過騎田嶺龐迎謁
後主驚曰若胡在此對曰大王之國非有萬里
之遙邊境不過至此極矣先是後主意郴州遠
在窮荒之北罰光圖居之故吏言如此

雷嶽不知何地人少績學能詞章尤工駢偶文

乾和末厯官御書院給事才名雅爲中宗所知
朝廷有大著作多出其手先是韶州證真寺僧
文偃自高祖時屢加欽重至是死其徒將葬之
乞銘中宗允所請命嶽撰身塔銘詞極宏贍抄
誦者踵門一時紙貴

陳守中里居家世不可考事後主官西御院使
集賢學士承旨遷大中太夫行左諫議大夫知
太僕寺事上柱國賜紫金魚袋守中博覽羣籍

富瞻詞翰著作爲當時詞臣之冠生平最精通
內典大寶七年昇雲門山證真寺爲大覺禪寺
命撰碑記多至三千餘言末云臣才異披沙學
同鑄水虔膺鳳旨紀實性以難周愧匪雄詞勒
貞珉於不朽撰成進上後主大喜卽命以原文
鐫於石厚予賞賚不知其所終

伍彥柔不詳其官大寶末宋潘美等圍賀州廷
議起故將潘崇徹統兵拒之崇徹辭不受詔後

主怒曰伍彥柔豈無方畧耶何必崇徹也遂拜
彥柔爲將使急率兵赴援美等聞彥柔將至先
退二十里以奇兵潛伏南鄉岸爲三覆以待之
彥柔夜至不知是計泊南鄉艤舟岸側遲明挾
彈登岸踞胡牀左右指揮伏兵卒發彥柔歟大
亂所將軍五萬死者十七八彥柔被擒死焉
盧收事後主官至招討使美等攻連州後主遣
收統兵拒騎田嶺嶺爲邊隘要地收晝夜戒嚴

鼓角聲不絕宋師挑戰多傷敗人不能過時李
廷珙已降宋引兵出春陵屯平陽去嶺百餘里
聞收堅壁禦守無計取勝思收所領將士多已
舊部下說之必勳策馬直至嶺前招之兵果謹
諫多相繼走宋軍降收知不可守乃燒壘潛遁
以餘衆退保清遠連州遂陷

李承渥不知所自起事後主數有戰功大寶十
三年賀昭桂連諸州相繼爲宋將潘美等所陷

後主意四州本楚舊地宋旣克復當卽旋師已
聞宋師長驅指韶州始懼命承渥爲都統將十
餘萬衆列陣韶之蓮花峯下先是承渥嘗教象
爲陣每象必十數人各操兵刃坐象背凡戰則
先驅象佈陣前以壯軍威至是列象待戰美等
盡索弩射象象不能抵相率奔蹏乘象兵士皆
傾側墮地自相踐踏步軍蹂躪死者不可勝算
美等率衆譟逐之遂大潰承渥遁歸韶州自此

不能守辛延偓累官韶州刺史承渥敗美等入
韶城被執拘留宋軍中見軍盛知不復可拒遣
人間道歸勸後主詣軍前迎降後主意動召諸
臣謀爲內太師李托所阻卿文遠事後主官至
諫議大夫出視師韶州承渥與美等戰文遠在
圍城中與辛延渥協力固守承渥旣敗走宋師
乘勝攻陷文遠被擒

植廷曉字朗伯東莞人爲將有勇畧見後主酷

虐日甚解去兵柄大寶十三年宋師旣破李承
渥拔韶州後主顧諸將無可使者始起用廷曉
命與郭崇岳統衆六萬屯馬逕列柵待敵明年
宋將潘美等陷英雄二州進次瀧頭後主遣使
請和美等挾使者直逼馬逕前鋒來挑戰廷曉
將發兵擊之崇岳屢言不可廷曉曰北軍乘席
捲之勢其鋒不可當也我士旅雖衆然皆傷痍
之餘今不驅策而前亦坐受其斃矣乃自領兵

握水而陣約崇岳爲後殿使禦宋軍奔衝美等
濟水廷曉迎擊力戰不勝遂死焉

蕭惟事後主厯官右僕射大寶末年正月宋將
潘美等克雄州進屯柵口砦於雙女山下後主
欲逃入海不果乃遣惟偕卓惟休奉表詣宋軍
求降潘美召諭以太祖意曰奉天子明詔謂彼
能戰則與之戰不能戰則勸之守不能守則諭
之降不能降則死不能死則亡非此五者他不

得受因留漵惟休不遣未幾隨宋殿直冉彥袞
入汴授太子中允卒惟休大寶時官中書舍人
與漵並使宋軍乞降被留同送至汴授太僕寺
丞

王珪大寶末官諫議大夫爲人性方直見宦官
輩用事素惡之宋將潘美兵日逼會衛兵與宦
者合謀盜金寶妃嬪走後主皇迫無計遣珪詣
宋軍通好使用隣國禮旣行後主料珪必不得

所請復遣蕭灌奉表稱臣乞降美等留灌遣珪
還師亦隨至國亡後從後主入宋太祖責問龔
澄樞等降戰翻覆及縱火焚府庫事澄樞等俯
首無語時珪在側數之曰昔在故國機務並爾
輩所專火又自內中起今天子遣使按問尙不
自承欲推過何人遂直前唾之手批其頰澄樞
等乃引服

馮邴其先始平人曾祖禧唐末官廣州遭黃巢

亂不得還遂註籍焉烈宗接禮中原人士禧精
術數策名嶺表逮邴祖父三世並爲日御至邴
夙承家學世其職國亡從後主至汴京授保章
正子元字道宗少聰慧七歲方讀易母夜夢異
人以紺蓮華與元吞之且曰善讀此後必貴顯
已而從父歸宋由大中祥符元年進士累官翰
林學士轉侍讀遷戶部侍郎卒事具宋史

胡賓王字時賢韶州曲江人少卽肆力問學流

覽極博馳聲遠近喜中宿峽山水奇勝遠絕人
境讀書其中經史疑義皆有發揮已而第進士
甲科累官中書舍人知制誥時後主淫虐不道
賓王逆知運數不能久棄官歸里著南漢國史
自烈祖至後主爲五主傳楊洞潛至陸光圖等
三十三人爲純臣傳又有具臣亂臣宦官女謁
諸傳合十二卷入宋後易名曰劉氏興亡錄上
之以明經授著作郎會詔有官者得與科試遂

登咸平庚子進士第以翰林學士致仕卒於家
賓王爲人樂易俊爽操行謹慎不苟言笑居官
憂國奉公務盡其職守鄉黨中有貧寡者必周
恤之晚於縣東二十里毬岡下構堂講書旁置
濯纓亭几案皆石爲之題有水向石邊流出冷
風從花裏過來香之語其風趣多類此又好表
章同里前哲遺文唐國子生邵謁有詩集爲序
而行於世卒後人號所居曰學士里

南漢書卷十三終

南漢書考異卷十三

順德梁廷枏章冉撰

劉傳傳

州境與正州接壤盜起推博羅縣吏張遇賢爲
帥

通鑑有神降於博羅縣民家註云博羅漢
古縣唐屬循州時爲漢土按方輿類纂博
羅縣隋屬循州南漢屬正州十國春秋地

異

理表亦云南漢改循州爲正別立循州於
北境領龍川縣一據此則遇賢爲正州人
攻據循州陸氏南唐書稱循州人張遇賢
本羅縣小吏蓋舉其地之舊名也春秋地
理表旣以博羅隸正州而殤帝紀又云遇
賢循州人遇賢傳云博羅人則自矛盾矣

曾芳傳

官程鄉令

黃通志曾芳者不知何許人南漢時爲程鄉令又云芳他政無所考然歷六七百年後而名傳不朽雖兒童走卒過其祠井下咸加禮拜其感人如此十國春秋亦云未詳何地人故漢時有爲廣州刺史者芳其後也廣州志曾井在潮州漢時縣令曾芳因民苦瘴以大囊藥投井令民汲飲之宋皇祐間狄青征儂智高經此軍士疾癘禱

異
於井飲泉盡愈旋師首以爲言仁宗降制
封芳忠孝公且賜飛白書曾氏忠孝泉五
字旌之按諸書並止稱芳仕南漢而不詳
何時何主不可與諸臣次列而循良吏治
難使泯沒無傳今以事蹟相類與謝傑等
並附博古傳後

暨彥贊傳

家世未詳

十國春秋云或曰吳暨艷後不知所據今姑闕疑

伍彥柔傳

不知其官

宋史遣大將伍彥柔領兵赴賀按彥柔歷官無考大將不過將帥之通稱十國春秋職官表南漢無以大將爲官名者而李承渥傳忽云積功至大將宋師破連賀諸州

後主署爲都統據其書法是又以大將爲
銜名矣似誤

盧收傳

兵果謹謀多相繼走宋軍降

十國春秋兵稍稍解去不云降也按廣州
人物傳揚旗揮之果謹謀而降今從之收
人物傳連州志並作枝春秋依之今從宋
史並續通鑑

李承渥傳

每象十數人操兵刃坐象背

續通鑑十數人皆執兵伏宋史銀傳每象
十數人皆執兵仗按執兵而伏則不能戰
矣通鑑伏當卽仗之訛今從宋史

兵遂大潰承渥遁歸

南漢春秋云承渥敗死按續通鑑宋史並
云軍遂大敗承渥以身免不云戰死也今

從之

卿文遠

續通鑑作鄒文遠今從宋史

辛延儻累官韶州刺史

續通鑑擒其刺史辛延儻宋史張傳亦作
刺史而李托傳又作節度副使兩傳互異
今從續通鑑

植廷曉傳

九國志續通鑑並作楊廷曉今從宋史

蕭灌傳

灌爲右僕射

宋史太祖紀及潘美傳並作左僕射今從
錢傳並續通鑑灌太祖紀作灌十國春秋
作灌今從美傳

大寶末年正月宋師進屯柵口遣灌與卓惟休
奉表詣宋軍求降

宋史銀傳美傳並作二月事按美等露布
劉銀遠懼傾危尋差人使初則稱臣上表
具陳歸化之心後則設詐藏奸翻作歟兵
之計臣與將士仰憑睿旨不敢逗留於正
月二十七日到柵口銀乃頻遣寮佐往來
商議漸無憑準似奉表求降在未到柵口
之前然續通鑑云正月甲子至柵口乙丑
至馬逕南漢主懼乃遣右僕射蕭灌中書

舍人卓惟休奉表詣軍門乞降據此則淮
等奉表求降在美等度馬逕後露布之言
知爲統舉之詞也今從之馬逕九國志作
馬遙文之訛也

馮邴傳

曾祖禧策名嶺表逮邴祖父三世爲日御至邴
仍世其職

十國春秋馮元傳四代祖官廣州烈宗據

南海僑斷士人故三世居嶺南爲日御大
寶末元父子從後主朝宋元父某授保章
正按四代祖禘卽元高祖云三世爲日御
是合禘并禘子及孫同官一職而邠不與
矣然考宋史元傳高祖禘以術數事劉氏
傳三世至父邠云傳三世者是禘之外更
歷三傳爲邠並官日御合禘實爲四世邠
入宋乃改授保章正也春秋誤今從宋史

又按宋史元幼從崔頤正孫奭爲五經大義與樂安孫質吳陸參譙夏侯圭善羣居講學號四友進士中第授江陰尉時詔流內銓取明經元自薦通五經謝泌笑曰子尙少能盡通耶據此則仕南漢爲日御者自邴而止元入宋時尙幼未嘗授官也南漢春秋傳題云日御馮元亦誤

胡賓王傳

韶州曲江人

南漢春秋云一作乳源人宋史地理志乳
源縣乾道二年析曲江之樂昌依化鄉於
州頭津置方輿類纂云乳源縣本曲江樂
昌二縣地宋以韶州諸縣水道不通析置
今縣於依化鄉仁村頭津口按乳源卽曲
江舊地南漢尙無乳源之名春秋誤

登咸平庚子進士

黃通志作咸平二年己亥進士然考諸志
並云陳堯咨榜則咸平三年庚子矣黃志

誤

異

南漢書考異卷十三終